

АКАФИСТ
преподобней матери нашей Евфросинии,
игумении и княжне Полотской

КОНДАК 1

Избранную Христову невесту песньми восхвалим днесь, вернии, Евфросинию. Сия бо княжна, дом отчий оставльши и во иночестве поживши добре, многия управляла есть ко спасению, во Иерусалиме плотию преставльшися, во Иерусалим Горний духом преселися и тамо присно за ны молится, ейже тако возопиим:

Радуйся, Евфросиние, невесто Христова всечестная.

ИКОС 1

Ангельски поживши, преподобная, постническим житием угодила еси Христу и небесныя радости причаститися сподобилася еси по скончании. Темже с горних высот призри на ны, тако тя величающия:

Радуйся, Российския земли похвало;

Радуйся, отрасли славная от рода Владимира равноапостольнаго;

Радуйся, именитых родителей чадо богоизбранное;

Радуйся, голубице непорочная;

Радуйся, девственнице чистая;

Радуйся, инокиням утешение;

Радуйся, ко Иерусалиму Небесному путеводительнице;

Радуйся, благочестия звездо;

Радуйся, заступнице к тебе притекающих;

Радуйся, целительнице недугов незримая;

Радуйся, ходатаице за ны теплая;

Радуйся, Евфросиние, невесто Христова всечестная.

КОНДАК 2

Видение бе радостное, егда по рождении твоём принесоста тя, преславная, родителя твоя во храм Господень. Тамо бо в купели крещения от первороднаго греха омылася еси погружением, и мира священным помазанием тя, яко отрасль младую, иерей привил есть ко Христу, да поеши Ему выну со избранными Его: Аллилуиа.

ИКОС 2

Разумом, свыше просвещенным, и чистым сердцем Христови от юности вручила еси себе, Предиславо, почасту во храм притекающи, в горнице во трудах присно пребывала еси, темже тя ублажаем:

Радуйся, Христови обрученная от купели крещения;

Радуйся, миром благодатным запечатленная;

Радуйся, Духа Свята вместилище чистое;

Радуйся, Тем умудренная во спасение;

Радуйся, во благое свыше укрепленная;

Радуйся, разум просветившая молитвою;

Радуйся, совесть стяжавшая крепкую во благом;

Радуйся, от младости уведевшая пути благочестия;

Радуйся, уклонилася бо еси пути гибельнаго;

Радуйся, трудолюбивая отроковице;

Радуйся, юных дев российских красото;

Радуйся, Евфросиние, невесто Христова всечестная.

КОНДАК 3

Силоу Вышняго укрепленная, возлюбила еси, преподобная, научение книжное и тому прилежала еси, мудрость же книжную постигши, паче прочих божественных книги избрала еси и, яже умудрити могут во спасение всякаго человека, усердно почитала еси, сладце поющи Господеви: Аллилуиа.

ИКОС 3

Имать днесь обитель твоя отроковицы многи и млада, научению книжному зданная. Сего ради усердно молим тя, всехвальная: призри на тыя и умудри я во спасение, – да ты величаем:

**Радуйся, ключ мудрости взыскавшая;
Радуйся, яко художество книжное постигла еси от младости;
Радуйся, тем отверзшая двери богопознания;
Радуйся, Священное почитавшая Писание;
Радуйся, от сего узревшая мира сущаго сотворение;
Радуйся, умиленная неизреченным Христовым низхождением к падшему роду нашему;
Радуйся, возлюбившая возлюбльшаго нас Господа;
Радуйся, Тому Единому поработати возжелевшая;
Радуйся, последи в чертог славы Его всельшаяся;
Радуйся, девственнице, юным девам незримая споспешнице в научении;
Радуйся, светильнице благочестия и знания;
Радуйся, Евфросиние, невесто Христова всечестная.**

КОНДАК 4

Бури житейских бед и напастей бежавши, преподобная, паче брака честна житие девственное возлюбила еси и от именитых женихов уклонилася еси, отроковице, да единому Жениху Небесному, – Христу поработаеши, поющи Ему: Аллилуиа.

ИКОС 4

Слышала еси, преподобная, яже апостол рече: *глаголю безбрачным и вдовицам: добро им есть, аще пребудут, якоже и аз; аще ли же ни, да посягают: не оженивый бо ся печется, како угодити Господеви*, – и сему поревновала еси, темже ты величаем:

**Радуйся, девственнице чистая;
Радуйся, путь иноческаго жития избравшая;
Радуйся, яко жребий девства прияти и вместити возмогла еси Божиею благодатию;
Радуйся, мирскаго треволнения избегшая;
Радуйся, тихаго пристанища взыскавшая;
Радуйся, Марии Лазареве подражавшая;
Радуйся, яко во храме, аки при ногу Христову, приметалася еси;
Радуйся, яко лику мучениц и преподобных жен приобщилася еси;
Радуйся, презревшая лепоту мира тленнаго;
Радуйся, неизреченныя радости в мире горнем днесь причастнице;
Радуйся, праведнаго жития образе;
Радуйся, Евфросиние, невесто Христова всечестная.**

КОНДАК 5

Бога точно боящися, не устрашилася еси, Евфросиние, тяготы жития иноческаго, кров же оставльши отчий, во обитель притекла еси, и облещи ты во ангельский образ умильне игумению молила еси, да не обязавшися куплями житейскими, выну пети сподобишися Христови: Аллилуиа.

ИКОС 5

Врача Небеснаго молила еси, всехвальная, да скорбь, родителема твоима отшествием учиненная, на радость предложится; оставила бо еси я, преподобная, да Христови послужиши и за рождших тя молишися, темже тя хвалим достойно:

Радуйся, избраннице Божия;
Радуйся, тайне из отчаго дома отшедшая;
Радуйся, во обитель всельшаяся княгини Романовы;
Радуйся, возложшая руку на рало делания духовнаго;
Радуйся, брачный венец отложившая;
Радуйся, главу покрывшая кукулем незлобия;
Радуйся, одеждам брачным одежду нищеты предпочетшая;
Радуйся, со приятием вервицы, аки мечем, вооруженная словом Божиим;
Радуйся, крест Христов, аки знамя веры, приемшая;
Радуйся, яко не посрами тя Господь во уповании;
Радуйся, родителя бо, пришедшая тя видети, от Писания тобою утешившаяся, в радости возвратистася;
Радуйся, Евфросиние, невесто Христова всечестная.

КОНДАК 6

Проповедника Павла, иже рече: *всяк подвижаяйся от всех да воздержится, послушающи, в посте и воздержании неослабно пожила еси, преподобная, во обители: суесловия бо бегала еси, и, песньми псаломскими назидаящися молилася еси, и, в добрем изволении утверждающися, выну пела еси: Аллилуиа.*

ИКОС 6

Возсия благодать в подвизах жития твоего, Евфросиние всечестная, по некоем бо времени во град Полотск преселилася еси, и, при храме Святыя Софии в клетце мале подвижающися, книги божественныя преписовала еси, и тако град ти присный полезным учением напаяла еси, слышащи от всех таковая:

Радуйся, Полотское радование;
Радуйся, девам сияние;
Радуйся, звездо благочестия;
Радуйся, смирения исполненная;
Радуйся, послушанием утвержденная;
Радуйся, с молчанием скорби терпевшая;
Радуйся, при храме бо, яко древле Богоотроковица, пожила еси;
Радуйся, мудрая княжно и инокине пречестная;
Радуйся, цвете постничества;
Радуйся, свете кротости;
Радуйся, упования неложнаго исповеднице;
Радуйся, Евфросиние, невесто Христова всечестная.

КОНДАК 7

Хотяй спасти тобою жены и девы многия во иночестве, Владыка Христос сиеваго видения удостои тя, преподобная: в соннем видении узрела еси себе, Евфросиние, принесену в Сельце к церкви Спасове, и Ангела ти рекшаго: *зде ти быти подобает.* Ты же абие от сна воставши, радостне пела еси: Аллилуиа.

ИКОС 7

Новое чудо бысть: тойже бо Ангел явився святителю Илии, повеле ему дати Сельце то на вселение ти и церквицу на молитву, еже и сотвори святитель абие. Сия поминающе, тако тя величаем:

Радуйся, ангельски пожившая;
Радуйся, Ангела Господня узревшая;
Радуйся, сладкия беседы его причастнице;
Радуйся, яко и пред святителем ходатай бе о тебе;
Радуйся, Ангелом и на всех путех твоих храненная;
Радуйся, кровом крил его огражденная;
Радуйся, не преткнувшая ноги твоея о камень гордыни;
Радуйся, сего ради видения зрака ангельскаго удостоенная;
Радуйся, яко явился ти, иже зрит лице Отца нашего Небеснаго;
Радуйся, не прогневльшая хранителя ничимже суетным и греховным;
Радуйся, сего ради радостныя вести удостоенная;
Радуйся, Евфросиние, невесто Христова всечестная.

КОНДАК 8

Странник, кров узрев, радуется и, пришед, покой си приемлет. И ты, преподобная, радости исполнилася еси, при церкви на Сельце водворившись со единою от инокинь, и ту основание обители твоея сотворила еси, отнюдуже Богови днесь возносится песнь великая, в вышних сугубо песнословимая: Аллилуиа.

ИКОС 8

Вся весть Господь, и ничтоже тайно, еже не открыется. Ведый же вся, коемуждо от человек изволение дарует: да изберет кийждо путь жития, и якоже кто поживет, по житию коегождо скончавшаяся судит. Яже памятующе, тако тя хвалим:

Радуйся, благий ярем Христов подъемшая;
Радуйся, по гласу ангельску на место пустынно отшедшая;
Радуйся, точию книги с собою принесшая;
Радуйся, со едином одеянием бывшая;
Радуйся, с тремя малыми хлебы всельшаяся;
Радуйся, прочая вся оставльшая;
Радуйся, пустыни украшение;
Радуйся, яко сродни на подвиг сей благословиша тя;
Радуйся, епископом Илиею утешенная;
Радуйся, яко вскоре к тебе многи инокини стекошася;
Радуйся, яко и обитель славная ту устроися;
Радуйся, Евфросиние, невесто Христова всечестная.

КОНДАК 9

Всемилоствитяго Спаса храм во обители создала еси и честными иконами украсила еси, преподобная, споспешествующей ти благодати Божией; древоделя бо на строение церковное некий глас буждаше, на скончание же храма дивне плинфы многи обретошася, яже зрящи, со умилением пела еси: Аллилуиа.

ИКОС 9

Ветия мудрая была еси, преподобная, памятовала бо еси слово Христово: *иже сотворит едину заповедей сих малых и научит тако человеки, сей велий наречется в Царствии Небеснем.* И, поучающи благочестию сестры своя, первое сия творила еси, темже ты величаем:

Радуйся, инокиням правило иноческаго жития;
Радуйся, яко в чистоте и целомудрии блюла еси юныя;
Радуйся, неложно старыя почитавшая;
Радуйся, скорбным споспешнице в терпении;
Радуйся, была бо еси всем образ смирения и благолепнаго хождения;

Радуйся, обличительнице осуждения и многословия;
Радуйся, приятелище дара прозрения сердец;
Радуйся, вопрошающим мудрая советнице;
Радуйся, миротворице сварящихся;
Радуйся, добродетельми преукрашенная;
Радуйся, великая российская дево;
Радуйся, Евфросиние, невесто Христова всечестная.

КОНДАК 10

Спасения ради и утешения Ефесскую икону Владычицы наша Богородица испросила еси из Царяграда, преподобная, во град Полотск. Обитель ину устроивши, тою иконою сию украсила еси, сестру же и две дщери братния, Кирианну и Ольгу, иночества обеты Христови обручила еси и во обителях твоих во спасение управила еси многия, поющи: Аллилуиа.

ИКОС 10

Стеною крепкою от искушений явися смирение твое: вся бо ти повеленная совершивши, яко рабу неключиму вменила еси себе, преподобная, кротостию и тихостию нрава паче злата и бисера украсила еси душу твою; темже тя величаем:

Радуйся, слуго чистая Девы Пречистой;
Радуйся, увеселила бо еси Полотск чудным Божию Матере образом;
Радуйся, великое сокровище Российстей земли тако стяжавшая;
Радуйся, многия девы во обитель Божию Матере приведшая;
Радуйся, присныя ти на путь спасения привлекающая;
Радуйся, мудрая управительнице во спасение;
Радуйся, две обители, яко свечи возжегшая;
Радуйся, теми просветившая страну Полотскую;
Радуйся, насадительнице древа иноческаго жития;
Радуйся, смирением утаевавшая высоту твоих подвигов;
Радуйся, строительнице Российския земли;
Радуйся, Евфросиние, невесто Христова всечестная.

КОНДАК 11

Песньми восхваляюще тя, терпению твоему дивимся, преподобная: всякия бо труды и скорби понесши, последи во Святую Землю странствие прияла еси, идеже, по желанию твоему, и скончатиcя приведе ти Господь, – тамо бо к Нему в старости маститей преселилася еси, подвиг добрый совершивши, с песнию: Аллилуиа.

ИКОС 11

Светозарная луча земли Российския! Аще плотию представилася еси от нас, преподобная, обаче духом с нами присно пребываеши. Во храме, тобою созданном, молящися и кресту, от тебе устроену, покланяющися, молим тя: прими от нас сицевыя хвалы:

Радуйся, древняя России сияние;
Радуйся, оныя днесь великия похвало;
Радуйся, славная Земли Святыя от севера пришельнице;
Радуйся, Гробу Христову поклонитися сподобльшаяся;
Радуйся, лампаду ту от земли Российския возжегшая;
Радуйся, у Гроба Христова ко Христу отшедшая;
Радуйся, у онаго крест земнаго жития твоего оставльшая;
Радуйся, Святыми Тайнами при скончании напутствованная;
Радуйся, на небеси от святых угодник радостно сретенная;

Радуйся, венцем славы от Небесного Жениха увенчанная;
Радуйся, мудрая дево, вшедшая в чертог Жениха Небесного со славою;
Радуйся, Евфросиние, невесто Христова всечестная.

КОНДАК 12

Благодати причастнице, усердно молим тя, Евфросиние всехвальная: пролий теплую твою молитву ко Всевышнему [за сродный ти дом Царя Российскаго и] за всю землю нашу православную, – да мудростию [царскою] и чистотою жития народного, яко дочь избранная, будет во языцех земля наша, и чада ея да внидут в горняя селения, поюще Богови: Аллилуиа.

ИКОС 12

Поюще тя, яко заступницу нашу теплую, инокиням же и девам обители твоея покров и утверждение, радуемся о тебе, преподобная, и молитвами твоими просимая приемлюще, с любовию величаем тя сице достойно:

Радуйся, яко мощи твоя, во отечество принесенныя, процветоша нетлением;
Радуйся, всехвальная, равноапостольнаго Владимира правнуко;
Радуйся, собеседнице равноапостольныя Ольги и всего богосветлаго лика праведных жен;
Радуйся, всельшаяся в скинию святых;
Радуйся, незримая о нас ходатаице;
Радуйся, болящих врачевание дивное;
Радуйся, печальных утешение неложное;
Радуйся, отрадо скорбящих;
Радуйся, опоро тя призывающих;
Радуйся, заступнице наша теплая у Христа;
Радуйся, дивная верою чтущих тя путеводительнице ко спасению;
Радуйся, Евфросиние, невесто Христова всечестная.

КОНДАК 13

О, всехвальная мати наша, Евфросиние всечестная! Моли за ны Господа и Матерь Его Пречистую, да укрепит наша немощныя силы и во спасение управит: юныя в чистоте соблюдет, девствующия укрепит в подвизе, во браце сущия в любви и мире усовершит, уврачует недужныя, просветит омраченныя, умершия простит и вся в чертоги Своя управит, идеже выну Ангели поют песнь хвалебную: Аллилуиа. (Трижды)

И паки читется икос 1:

Ангельски поживши, преподобная, постническим житием угодила еси Христу и небесныя радости причаститися сподобилася еси по скончании. Темже с горних высот призри на ны, тако тя величающия:

Радуйся, Российския земли похвало;
Радуйся, отрасли славная от рода Владимира равноапостольнаго;
Радуйся, именитых родителей чадо богоизбранное;
Радуйся, голубице непорочная;
Радуйся, девственнице чистая;
Радуйся, инокиням утешение;
Радуйся, ко Иерусалиму Небесному путеводительнице;
Радуйся, благочестия звездо;
Радуйся, заступнице к тебе притекающих;
Радуйся, целительнице недугов незримая;
Радуйся, ходатаице за ны теплая;
Радуйся, Евфросиние, невесто Христова всечестная.

И кондак 1:

Избранную Христову невесту песньми восхвалим днесь, вернии, Евфросинию. Сия бо княжна, дом отчий оставльши и во иночестве поживши добре, многия управляла есть ко спасению, во Иерусалиме плотию преставльшися, во Иерусалим Горний духом преселися и тамо присно за ны молится, ейже тако возопиим:

Радуйся, Евфросиние, невесто Христова всечестная.

Молитвы преподобней Евфросинии

Молитва первая

О, преподобная и приснопамятная, всехвальная мати Евфросиние, Ангеле во плоти, богоизбранный сосуде Святаго Духа, Церкви Христовы похвало и украшение, монашествующих славо и утверждение, отечеству, обители твоей и всей стране помощи, покрове и защитнице! Ты еси, яко древо, насажденное при исходящих вод, плоды добродетелей твоих и благодатными дарованиями Святаго Духа украшенная, наставнице делом и словом, избранная, непорочная и добрая, услыши ны, молящиеся тебе и призывающие имя твое: имаши бо дерзновение у Господа. Испроси нам преспеяние в жизни добродетельней, огради сердца наша верою, надеждою, и любовью, и страхом Божиим. Поддай нам помощь в трудах и скорбех наших, и якоже попечение имела еси в житии твоём о обители твоей и иночествующих, тако и ныне потщися о нас благопоспешити нам во всем; и обитель твою огради миром и защити от враг видимых и невидимых, да преуспевает и процветает в добродетелех. Изми ны от всякия нужды и тесноты, от лютых болезней и от нечаянныя смерти и приведи ны ко истинному покаянию при исходе из жизни сея. Испроси нам у Господа Бога кончину мирну, безболезненну, непостыдну, Святым Таин причастну и преведи ны чрез мытарства воздушная, да не похитят нас истязателие грознии по грехом нашим, но да твоим заступлением и помощью возможем безбедно проити истязание воздушное, и милость получитьи, и предстати неосужденно Страшному Престолу, и на Страшном Судищи сподобитися одесную стати Праведнаго Судии и наследовати праведных часть. Ей, госпоже, всечестная мати, преподобная Евфросиние, помози нам молитвами твоими, огради нас и заступи от всяких козней вражиих, да сподобимся преити время жизни сея непреткновенно и спасение получитьи молитвами твоими у Христа Господа, Егоже и сподобимся пети и славословити со Безначальным Отцем и со Святым Духом во веки веков. **Аминь.**

Молитва вторая

О, преподобная и богоносная мати наша Евфросиние! Предстоящи престолу Пресвятыя Троицы, молися выну о Велицем Господине и отце нашем Кирилле, Святейшем Патриарсе Московстем и всея Руси, и о Господине нашем Высокопреосвященнейшем Филарете, Митрополите Минстем и Слуцтём, Патриаршем Экзарсе всея Беларуси, и о Господине нашем Высокопреосвященнейшем Феодосии, архиепископе Полотстем и Глубокстем, и о всем священном и иночестем чине, игумении же и сестрах обители твоея, о военачальницех и градоначальницех, и о всех православных христианах: да ходим кийждо достойно звания нашего, в немже звани быхом, и да будет земля наша – земля добрая, и вси живущии на ней – род избран, царское священство, язык свят, людие обновления, ныне, и присно, и во веки веков. **Аминь.**